

## Сийрат дарслари (23-дарс)

СИЙРАТ  
дарслари 23-дарс

Сийрат дарслари Шайх Мұхаммад Содиқ Мұхаммад Юсуф роҳимаҳуллоҳнинг  
«Бу – Расулуллоҳ соллаллоҳ алайҳи васаллам» таржима китоблари ва  
“Ҳадис ва ҳаёт”нинг 19-жузъи асосида бериб борилади. Мавзуларнинг тўлиқ матни  
билин танишиш учун китобнинг ўзига мурожаат этиш тавсия этилади.

13:45 / 08.03.2019 4480

\* \* \*

155. Абу Мусо Ашъарий розияллоҳу анхудан ривоят қилинади:

«Набий соллаллоҳу алайҳи васалламнинг ҳузурларига бир гуруҳ ашъарийлар билан келдим. Биз у зотдан улов беришларини сўрадик. Шунда у зот: **«Аллоҳга қасамки, сизларга улов беролмайман. Менда сизга берадиган улов йўқ»,** дедилар.

Кейин Аллоҳ хоҳлаганича кутдик. Сўнгра у зотга туялар келтирилди. Бизга ўркачли учта оқ тuya беришга амр қилдилар. Жўнаб кетаётиб бир-бирилизга: «Аллоҳ бизга барака бермасин, Расулуллоҳ соллаллоҳу алайҳи васалламнинг ҳузурларига улов беришларини сўраб келдик. У зот бизга улов бермасликка қасам ичдилар. Сўнгра бизга улов бердилар», дедик. Шунда у зотнинг ҳузурларига бориб, хабар беришди. Сўнг у зот: **«Сизларга мен улов берганим йўқ, Аллоҳ сизларга улов берди. Мен, Аллоҳга қасамки, иншоаллоҳ, бир нарсага қасам ичмайман. Мабодо ичсам ҳам ундан яхшисини кўриб қолсам, қасамимнинг каффоротини бераман ва ўша яхши ишни қиласман»,** дедилар».

Бухорий ва Муслим ривоят қилишган.

\* \* \*

*156. Абу Масъуд Ансорий розияллоҳу анҳудан ривоят қилинади:*

«Ансорийлардан Абу Шуъайб исмли одам бор эди. Унинг гўшт сотадиган ғуломи бор эди. У Расууллоҳ соллаллоҳу алайҳи васалламни кўрди ва юзларидан очликларини билди. У ғуломига: «Шўринг қурғур, бизга беш кишилик таом тайёрла, мен Набий соллаллоҳу алайҳи васалламни беш киши билан чақирмоқчиман», деди. Сўнг у (таом) тайёrlади. Сўнг Набий соллаллоҳу алайҳи васалламнинг олдиларига бориб, беш кишини чақирди. Уларга бир киши эргашиб келди. Набий соллаллоҳу алайҳи васаллам эшик олдига етганларида: **«Мана бу бизга эргашиб келди. Истасанг, изн бер. Истамасанг, қайтиб кетади»**, дедилар». «Аммо мен изн бераман, эй Аллоҳнинг Расули», деди.

*Бухорий ва Муслим ривоят қилишган.*

\* \* \*

*157. Абдурроҳман ибн Абу Лайлодан ривоят қилинади:*

«Муҳаммад соллаллоҳу алайҳи васалламнинг саҳобалари бизга айтиб беришди. Улар Набий соллаллоҳу алайҳи васаллам билан юришганда бир киши ухлаб қолибди. Баъзилари унинг арқонини олиб қўйибди. У чўчиб кетибди. Шунда Расууллоҳ соллаллоҳу алайҳи васаллам: **«Мусулмон мусулмонни чўчитиши ҳалол эмас»**, дебдилар».

*Абу Довуд ривоят қилган.*

\* \* \*

*158. Абу Айюб Ансорий розияллоҳу анҳудан ривоят қилинади:*

«Набий соллаллоҳу алайҳи васаллам уникига тушдилар. Набий соллаллоҳу алайҳи васаллам паст қаватга жойлашдилар. Абу Айюб тепада эди. Бир кечада Абу Айюб эслаб қолди. «Расууллоҳ соллаллоҳу алайҳи васалламнинг бошлари устида юрибмиз», деди. Улар бир тарафга ўтиб, четда тунашди. Сўнг Набий соллаллоҳу алайҳи васалламга айтди. Шунда Набий соллаллоҳу алайҳи васаллам: **«Паст осонроқ»**, дедилар. «Сиз остида

бўлган шифтнинг устига чиқмайман», деди. Набий соллаллоҳу алайҳи васаллам юқорига кўчдилар. Абу Айюб пастга тушди.

У Набий соллаллоҳу алайҳи васалламга таом тайёrlар эди. Унинг олдига ўша таом келтирилса, у зотнинг бармоқлари ўрнини сўrap ва у зотнинг бармоқлари изини излар эди. Бир куни саримсоқли таом тайёrlади. Унинг хузурига (таом) қайтариб келинганида у зотнинг бармоқлари ўрнини сўради. Унга: «емадилар», дейишди. У чўчиб кетди ва у зотнинг хузурларига кўтарилиб: «У ҳаромми?» деди. Шунда Набий соллаллоҳу алайҳи васаллам: **«Йўқ. Лекин мен уни ёқтирмайман»**, дедилар. «Албатта, мен ҳам сиз ёқтирмаган нарсани ёқтирмайман» ёки **«ёқтирмадим»**, деди. Набий соллаллоҳу алайҳи васалламга ваҳий келиб турарди».

*Муслим ривоят қилган.*

\* \* \*

**159. Анас ибн Молик розияллоҳу анҳудан ривоят қилинади:**

«Набий соллаллоҳу алайҳи васаллам билан бирга кетаётган эдим. У зотнинг устларида ҳошияси йўғон нажроний бурда бор эди. Бир аъробий у зотнинг йўлларини тўсиб, ридоларидан ушлаб қаттиқ силтади. Шунда Расулуллоҳ соллаллоҳу алайҳи васалламнинг бўйинларининг орт томонида кийимнинг изи чиқиб қолди. Сўнgra у: «Эй Муҳаммад! Менга ҳам хузурингдаги Аллоҳнинг молидан берилишига амр қил!» деди. Набий соллаллоҳу алайҳи васаллам бурилиб, унга қараб кулдилар ва унга ато беришга амр қилдилар».

*Бухорий ва Муслим ривоят қилишган.*

**«Бу - Расулуллоҳ соллаллоҳу алайҳи васаллам» китобидан**